

Een koeke mee 'n draaiomme

Door Engel Reinhoudt

Van Rachel van de Vrede kreeg ik een stuitje elee een oud schrift mie aollerande vèsjes en gedichtjes. A 'k de naem goed ontcieferd è is het van eêne L. Kruideniers. Sommige van de gedichten ei de man voor'eleze voe de radio. Vara en Avro worre aollebei verschillende keêren enoemd mie de datum d'r bie en ok wat at 'n d'r voe kreeg. Zô wier het gedicht 'Scharretjoe' uut'ezonde op 17 juli 1954 en die kreeg 'r tien gulden voe.

Ik kend'n z'n naem nie en a je dit leest en je weet meêr over de man, dan oar ik dat graag. Noe volge een paer vèsjes uut het schrift.

Scharretjoe. De schuuutjes bin an, d'r is vis an de mart. Vee scharretjes, tongen en plaete! Sprienglevendig goed, as 'n spieker zô ard! En d'omroeper gaet deur de straete.

Ie slaet op z'n koperen bord dat 'het kliengt. En roept almae 't zelve en de visvrouw zientg: Scharretjoe - oe - oe- oes!!!

Gevoel voe humor ao de dichter beslist. Vee van de vèsjes è een komische inslag, Zô vertelt het gedicht 'De booschap' van eêne Jaep die a naè Rotterdam goeng. Eênmaal klaer mie z'n akkevietjes gieng'n naè de Bieëkurf omda z'n vrouwe evrogen ao om wat mee te briengen. Die wist alleêne nie mî wat.

Ie ad 'n uur lank es-en-des gelôpe en prottesteerde: " 'k Bin 't kwiet helaes!"

Toen kwam 'n waer ze amme en woste verkôpe en ok nog van die butenlandse kaes.

De lochte van die kaes kwam in zien neuze. "Noe weet ik wat de Vrouwe ei ezeid"

- Zei Jaepje en ie zocht a naè zien beuze " - ' Brieng kousens mee a j'r tied vor eit!

Dikkels bin 't het verhaaltjes op riem. In het gedicht 'Operere' wor Ko ziek en mô naè 't ziekuus. Ko was nie gewend z'n eigen te wassen en daè dee ze 'n eêst eëlemaele es lekker in bad en um docht a dàt de operatie was. *'Ie zei: "In de rats ezete? Man, dat eb ik toch zôvee, mae 'k a 't het eêrder motte wete, de operatie viel best mee.'*

Ok toen a was het mode om de Zeêuwse lekkernijen te verheerlijken: gornaet, babbelaers en bolussen.

1. Het eêrlijkste dat Zeêland eit, dat is neê mis! gin boeremeid, gin mossels en geên gorrenaed, geên kreukels, zeêkrael en geên plaet! Maer 't is de bolus, glôôf mae vrie! Aol 't aere 'aelt 'r glad nie bie. Dat is 'n koeke mee 'n draai-omme. Daer moe je vor in Zeêland komme!

2. De bolus plakt an aole kant, mae lekker man! Ik waertertand noe ik 'r ier zô over praet. D'r is niks wat 'r boven gaet. Mee vose Zeêuwse beuter is 't of 'n iengeltje op je toenge p(la)st. En ik vraeg aoltied mae weeromme: "Gee mien mae 'n koeke mie 'n draai-omme.

.3. Die van den Overkante zeit, dat um de beste bolus eit. De Middelburger zeit: "Da's mis!" En dat de ziene beter is. In Vlissinge oêr je nie aers. Mae 'k lap dat aolles an mien laers, wanr waer ik ok in Zeêland komme, lust ik een koeke mee 'n draai-omme!

Tenslotte nog een saemenvatting van een komisch vèsje over een man van 't negentig die a een kunstgebit bestelt tegen de zin van z'n zeune in, wan die vindt het geld versmosse op die leeftied. Het commentaer van d'ouwe Ko is eêl gevat, wan die zei dat 'r meêr doad gae benee z'n leeftied dan d'r boven. Daè vaol nie vee tegenin te briengen.

Reacties: Werrilaan 21, 4453 CA 's-Heerenhoek. E-mail:cn.zeeuws@zeelandnet.nl. Nae een maend is dit stikje ok nae te lezen op www.zeeuwsezanger.nl